

DEN AMBIENTE



POETS

"EL PADRINO SONNY HOO LO BAY LANTA TRIPLE SSS BACK."

Durante fin di aña tabata na Aruba Sonny Hoo, famoso saxofonista, director y propietario di e tremendo agrupacion "TRIPLE SSS", cual den añanan '80 tabata e banda mas gusta y mas popular na Aruba. Sonny Hoo ta tata di Larry Hoo popular trombonista di formacion Pride.

Actualmente Sonny ta residencia na St. Maarten y a bin celebra Pasco y habri aña nobo riba su dushi isla Aruba. Sonny den añanan '70 tabata forma parti di un di e mihor agrupacion musical di es tempo ey "LOS JUVENILES" hunto cu Robert Jeand'or. Despues den aña '81 e la dicidi di lanta su mes un agrupacion Triple SSS, hunto cu Casin Giel.

Tur esnan cu ainda por corda Triple SSS, cu nan hitnan grandi manera TUMATUR, PALOMA, EL SAPATERO, NO PUEDO VIVIR SIN TI y MALA MUHER, tabata piesanan cu tabata zona pisa riba radio-emisoranan tanto na Aruba y den exterior. Na dos ocasion nan a sabi di sali banda di aña.

Tur e integrantenan di Triple SSS tabata musiconan respetu y popular manera: Casin Giel, e rumannan Papito y Erick Rafael, Fio Wester, Stanley La Cruz y Gerald Martis cu actualmente ta formando parti di Papito y su Doble Sabor, tambe su yiu Larry Hoo.

Nan tabata e agrupacion mas mihor uniforma y tur nan fiestanan tabata hopi bon bishita. Triple SSS sigur tabata un di e mas exitoso agrupacion den historia di farandula na Aruba y Antiyas. Tur cos bon sa tin nan final y asina a pasa cu e popular banda aki tambe. Tabata na aña '85 cu Lago a sera su

portanan caminda cu Sonny y Casin tabata labora, y nan mester a busca nan futuro den exterior.

Casin a haña un oferta na Hulanda mientras Sonny a logra di haña un fabuloso oferta como havenmeester na St. Maarten. Asina tambe a yega e fin di e tremendo agrupacion aki. Despues Papito Rafael cu tambe tabata forma parti di Triple SSS, a logra di lanta e actual Papito y su Doble Sabor cu mayoria di ex integrantenan di Triple SSS.

Na aña '87 Casin a dicidi di restablece su mes na Aruba, y a bay den su neishi back hunto cu Papito y su Doble Sabor. Sonny Hoo actualmente ta director general di Ports Authority na St. Maarten, y ta preparando pa regresa su pais back prome cu fin di aña 1992.

Mirando cu mester mas competencia entre e grandinan, Sonny tin pensa di bolbe bay lanta un banda cu e mes un nomber Triple SSS atrobe. Durante su estadia na Aruba den temporada di fiesta e la haci bon contactonan cu algun musiconan di alto nivel pa restablece Triple SSS back.

DEN AMBIENTE por a compronde cu e banda aki no ta bay ta un banda solamente pa bailenan local, pero pa haci grabacionnan di piesanan original Caribense pa mercado internacional y cu posibilidadnan pa bay den giranan. Segun Sonny cu a yega tempo pa nos musiconan local cuminsa move bay den grandi.

E tin hopi fe den nos musiconan local, pasobra nos por pero ta contactonan bon nos mester. Maske cuanto DEN AMBIENTE a purba pa saca



Ex Triple SSSnan, Casenger, Papito, El Padrino Sonny y Fio.

for di Sonny cual ta e integrante nan cu e tin pensa pa bay forma Triple SSS back, Sonny a keda boca callao.

Pero durante e fiesta di despues di tiro den Esso Club constantemente DEN AMBIENTE tabata observa Sonny ta studiando, vigilando e actuacion di Papito y su Doble Sabor. Tambe por a mire den combersacionan hopi sospechoso cu algun di e integrantenan di Papito y su Doble Sabor.

Tambe DEN AMBIENTE a capta Sonny hunto cu e roadmanager di e banda, Nelis Winklaar (Jason King) ta cuchi cuchi cu otro den un sitio priva, y a keda ta vigila nan te ora nan a duna otro un man manera nan yega den un acuerdo cu otro. Papito mes tabata hari y goza henter anochi.

Sonny Hoo BON BINI riba bo dushi isla back, y ta desea bo tur clase di exito cu bo banda nobo TRIPLE SSS. Corda bon DEN AMBIENTE lo keda vigila e movecionnan di e banda Triple SSS. "DOBLE SABOR LO HAÑA UN "S" MAS ???



El Padrino negociando cu e roadmanager Jason King.

Pa cualquier ocasion

ABSOLUT VODKA

ta e bebida preferi



Agente exclusivo
LICORES ARUBA